

HITZ BITAN

NATURA 2000

Ipar Euskal Herria Europako laguntzarik gabe geldi daiteke

Hur Gorostiaga | BAIONA

Ipar Euskal Herria EB Europako Batasunaren diru laguntzarik gabe gelditu liteke heldu diren urteetan, Frantziak Natura 2000 fauna eta flora babesteko Europako Batzordearen plangintza behar bezala betetzen ez duela eta.

Europako Batzordeak 15 eguneko epea eman dio Frantziari Natura 2000ren gomendioekin bat egin dezan, eta gaur egun dituenak baino babestutako naturgune gehiago izenda ditzan. Bestela EBk erabakitako fondo estrukturalik gabe geldituko litzateke, Batzordearen gomendioak ez errespetatzeagatik.

Akitaniari dagokionez, 3,5 mila milioi liberako diru galtzea izan liteke, Bruselak bere mehatxua bururaino eramanez bala, atzo Akitaniako prefetak jakinarazi zuenez.

Lapurdi, Nafarroa Beherea eta Zuberoarendako galerak zenbatekoak liratekeen jakitea ezinezkoa bada ere laguntza horien garrantzia azpimarratu zuen Jean Michel Drevet Baionako suprefetak asteartean. Andre Viau prefetak aldiz, Hitzarmen Bereziko proiektuetan eragin zuzenik ez duela ukanen adierazi zuen, baina zenbait proiektuk –hala nola Miarritzen egitekoa duten Surfaren jauregiak– Europako laguntzak ezinbestekoak izanen dituzte.

«Bruselaren xantaia»

Pirinio Atlantikoetako lehendakari Jean Jacques Lasserrek, aldiz, «Bruselaren xantaia» salatu zuen «tamalgarria» dela erranez eta 15 eguneko epea «deusen egiteko motzegia» dela azpimarraturik.

Alain Rousset Akitaniako lehendakariarendako, aldiz, «lehentasuneko gaia» izanen da heldu den astean Bruselara (Belgika) eginen duen bidaiari, bertan Europako Batzordeko ordezkariekin biltzekoa baita, besteak beste. Loyola de Palacio Garraio komisarioarekin ere egotekoa da Rousset.



JOXE LACALLE

UEUren Iruñeko ikastaro bat, iaz.

URTEURRENA. 25. ekitaldia da Nafarroan

Satrustegiren hitzaldi batekin hasiko dira bihar UEUren Iruñeko ikastaroak

Erredakzioa | IRUÑEA

Jose Mari Satrustegi historialari nafarraren hitzaldi batekin hasiko dira bihar UEU Udako Euskal Unibertsitatearen Iruñeko ikastaroak. Esanahi berezia dute aurten, Iruñean egiten hasi ziren 25. urteurrena ospatzen baita. Hori dela-eta, 29tan, haritzak 25 kimu izena jaso dute aurten. Haritzak UEUren sendotasuna islatu nahi du eta 25 kimuak, berriz, UEUren ernamuin nafarrak, gerora haritz bilaka daitezkeenak.

Bi astez, 22 ikastaro egingo dira Iruñeko Larraona ikastetxean 244 irakasleren eskutik. Oraingo 500etik gora dira ize-

na eman duten parte-hartzaileak, baina ikastaroak abian jarri ahal beste dozena batzuek ere izena ematea espero dute. Iazkoarekin alderatuta parte hartzaileen jaitsiera izan dela onartu du Idoia Torregarai UEUko komunikazio arduradunak, baina udako beste kurtso guztiek ere beherakada jasan dutela azpimarratu du.

Ohikoa den moduan, naturzientziei loturiko ikastaroek lortu dute arrakasta gehien. Zehazki, jende askok interesa azaldu du *Babesguneak: kontserbazioa eta kudeaketa* izeneko ikastaroak. Lezioen helburua izango da munduan dauden babesgune mota nagusiak ezagu-

tzea, bakoitzaren baliabide, abantaila eta eragozpenak eza-gutzearen.

Nafarroako Gobernuak diru laguntza kendu du

Aurtengo ikastaroen beste ezaugarria da Nafarroako Gobernuak azken urteotan emandako diru laguntza kendu duela, inolako arrazoirik eman gabe gainera. UEUk bitxitzat jo du erabakia, aurretik Iruñeko agintariek beren lana goraiatu izan zutelako.

3,5 milioi pezetako laguntza kentzea ez da izan Nafarroako Gobernuak UEUri jarritako traba bakarra. Izan ere, azken urteotan ikastaroen egoitza –Iruñeko Iturrama ikastetxea– «oposizio batzuetarako» behar duela argudiatu du Miguel Sanzen gobernuak. Oposizio horrek berak eragozten omen du Iruñeko eta Iruñerriko edozein eskola erabiltzea. Hortaz, Larraonan egingo dute.

LAPURRETAK

Lau gazte atxilotu dituzte Bilbon, taberna bateko pertsiana hausten ari zirela

Ertzaintzak lau gazte atxilotu zituen atzo goizaldean, Bilboko Vicente Zabala kaleko taberna bateko pertsiana apurtzen ari zirenean. Poliziak ikustean, gazteak ihes egiten saiatu ziren, baina berehala atxilotu zituzten ertzainek. Atxilotuetako bi adin txikikoak zirenez –15 eta 16 urtekoak– beren senideen esku utzi dituzte. Beste biak, 20 urteko bilbotarrak, epailearen esku geratu dira.

Ihesean 140.000 pezeta utzi zituen ustezko lapurra harrapatu du Ertzaintzak Bilbon

J.A.G.R. 28 urtekoa atxilotu zuen atzo goizaldean Ertzaintzak, Bilbon. Ertzaintzak dioenez, patruila bat ohartu zen Manuel Allende kaleko taberna batean sartu zela norbait. Une horretan, lapurrak alde egin zuen, ostutako 30.000 pezeta zituela. Ihesean, oster, beste 140.000 pezeta utzi zituen tabernaren barruan. Ertzainek berehala atzeman zuten J.A.G. R. Ohiko gaizkilea da, 28 aldiz atxilotu baitzuten atzo arte. Bilbon ere, ertzainek beste lagun bat atxilotu dute San Frantzisko auzoan, emakume bati lapurtzeko asmoz eraso iza-naz akusatuta.

TURISMOA

4.000 lagunek erabili zituzten EAEko landetxeak iragan maiatzean

Guztira 4.020 lagunek erabaki zituzten iragan maiatzean Euskal Autonomia Erkidegoko 195 landetxeak. Turista gehienak, %60,4 Hego Euskal Herrikoak ziren. Ondotik datoz madrildarrak (%8,1), katalanak (%7,1) eta errioxarrak (%5,5). Bisitari bakoitzak, batez beste, bi gau pasa zituen baserrian.

DIRU FALTSUA

Ertzaintzak lau lagun atxilotu ditu Donostian diru faltsua erabiltzeaz akusatuta

Eusko Jaurlaritzako Barne Sailak atzo jakinarazi duenez, Ertzaintzak lau lagun atxilotu ditu Donostian diru faltsua erabiltzeagatik. Ategorrietako tabernari batek salatu zuen bi botila ur 10.000 pezetako billete faltsuarekin pagatu zizkiotela. Poliziak berehala aurkitu zituen lau akusatuak –hiru gizon eta emakume bat– eta beste billete faltsu bat aurkitu zizkien. Gros auzoko beste dendari batzuek ere diru faltsua jaso zutela salatu zuten.

ERASOA

Lagun bat atxilotu dute ume batzuei sardexka lepoan jartzeagatik

Ertzaintzak 22 urteko gizonetako bat atxilotu zuen ostiral gauean Gasteizko Iturritxu kalean. Antza denez, atxilotuak ume batzuei mehatxu egin zien, sardexka bat lepoan jarri eta zulatzeraino. Atxilotzeari aurre egiten ahalegindu zen gazteak.

ALARDEA

Bidasoaldeko jeltzaleei berdintasunaren hazia zabaltzeko eskatu diote Ibarretxeri alarde mistoen aldekoek

Irungo eta Hondarribiako EAJko kideek berdintasunaren alde egin dezatela eskatu zioten atzo Juan Jose Ibarretxe EAEko lehendakariari Bidasoaldeko Emakumeak eta Alardea Guztiontzat taldeek. Alarde mistoaren aldekoek gogorarazi zuten Ibarretxek gizon eta emakumeen parekotasunaren aldeko mezua egin zuela inbestidura saioan. Aitzitik, bi taldeok uste dute Bidasoaldeko jeltzaleak direla «emakumeek alardeetan parte hartzeari buruzko gatazka bide zibilizatuan konpontzeko oztopo nagusia». Ibarretxeren mezuak emaitza praktikoak izatea espero dute Bidasoaldeko Emakumeek eta Alardea Guztiontzat taldeek.

EZBEHARRA

Gizonezko bat hil da Elortzen gertatutako auto istripuan

Oscar Alfonso Zazpe Anbun 36 urteko iruindarra istripuz hil zen atzo goizaldean trafiko istripuz, Elortzen. Ezbeharra goizeko 05:25ean gertatu zen, NA-2310 errepidean. Zazperen autoa bidetik atera zen eta gidariak kolpe handia jaso zuen. Larri zaurituta zegoela Iruñeko Bideko Amaren erietxera eraman zuten eta han hil zen.